

S'qu'nôs vlain pus vouêre



Concoué 2005

Le Vâlat

S'qu'nos vlan pus vouère

C'ment an cimentait les étales en 1945

Le piaintchie d'note étâle était tot en bôs, fait de piaitons de 3 cm d'épassou, d'vés-d'dôs d'cés d'l'épâlou, des ptchus qu'ètînt maînè po r'teni lai mieûle, què fayait vudie â peûjou dains ènne grosse soiye, qu'nos poétchînt po lai voichaie dains le beureut piaicie de côte d'lai pouêteche d'étâle.

In cop qu'èl était piein, qu'nos aivînt aippiaiyie note "bichette", nos allîns le vudie dains lés tchaimps, è nos fayait tote ènne vâprèe, se boudgi po être prât d'vaint d'aifforaie. C'était ènne s'nieûle què fayait r'ècmencie prou s'vent, qu'lai mieûle ne soyeuveuche pe les piaitons.

Coli f'sais dje ènne boussiatte qu'mon père s'musaie : Che pé c't'étâle était cimentaie. C'ment brament de dgens d'note càre, nos n'aivîns'p brament de sous.

È se d'maindé c'ment è porait faire, sains tra déboéchie, aidonc è s'diét : po aivoi di sâbye et di graîvie, è me fat des pieres, ïn gros moncé, et ènne concaissouse, d'înche i veut dje aivoi ènne païtchie de ço què fat.


Aiprés aivoi prou maîyennaie, è décidé d'entrepâre cte grande besoingne, po coli è se boté è raiméssaie des pieres, qu'èl allait botaie en moncé dains lai carriere, d'vés-tchus de tchie-nos.

Mon père aivait ènne piece de tiere d'aivo bîn des reûtchèts qu'ètînt è rais de tiere, embétains po y faire lai tchairrûe. Aidonc, è se musé i veus faire sâtaie cés reûtchèts, è les é ïn pô dégaïdgie, po révisaie voué è fayait poichie le ptchu, po qu'ès sâteuchînt d'aidroit di premie cop, qué temps qué fayait po poichie ïn ptchu d'ïn-d'mé mètre tot en viraint lai bairraimine. Tirie feûs le sâbye di ptchu, d'aivo ènne petéte curatte, qu'an f'sais d'aivo ïn gros flé de couvre aipiaiti en ïn bout é ploiyie po faire tçhlie.

C'ment mon père aivait ïn pô tieûsain de tchairdgie lai mine, é f'sé v'ni ïn coégnéchou, le vèye carrie de Saigneleudgie, François Conti dit : "Mourette " que yé aippris c'ment faire : Tiyssie dains ci ptchu ïn échepèce de tyau en couvre, r'loiyie â bout d'lai moétche (le détonateur) l'envirtolaie d'lai boinne meujure de ço que fayait po faire è sâtaie cés reûtchèts, (d'lai cheddite) soûetche de paîte. An bourrait sains biassie lai moétche, retieuvri les reutchèts de raims d'saipîns entrecroujies po envoïdgebraie les pieres de sâtaie tra loin. Enfûere lai moétche, se chiquaie di daïndgie...Poum ! le gros di traivaiye était dje fait . Encoué quéques ceps de pieutchèts po révaie ço que d'moérat qu'était dje bîn démisloquaie.

C'ât d'aivo le tché è effremoûeres, bîn chur encoué des rues è scoïches, qu'nos aimoinnînt totes cés pieres en lai carriere, po les botaie â moncé qu'mon père aivait dje ècmencie, tos les ceps qu'èl aivait èparoiyie ses tchamps aiprés lai tchairrue.

Tiaïnd le moncé de pierre feut prou grôs mon père è creuyie â londg de l'hôtâ voué était l'aissiette di femie, po y faire ïn creux de mieûle, tot è brais, pâre lai boinne tiere po lai condure voué è y en mainquaie tchus les finaidges, tot en botaint de côte les pieres, aïtot qu'lai groïse qu'è trovait en creûyaint.



En lai fin di mois de mai, tiaïnd qu'an ât tiytte de rentraie les bêtes en l'étâle, èl allé tchri vés ci chire Geiser de Lai Farrée lai concaissouse, ènne che poïjainne brequainne, que po lai faire aivaincie les dous tchvas daivînt bèyie ïn bon cop de boré chutot po l'ébranlaie.

Po concaissie nos étîns trâs, ïn po rontre les pus gros caiyos aivo lai masse d'vaint d'les tchaimpaie tchu lai tâle, ïn tchu lai machine po enguenaie les pieres dains ïn

échepece d'embossou d'aivo tot â fond des maitchés qu'les écâchînt, les gros caiyos aivînt di mâ de péssaie, c'ât d'aivo le bout di maintche de lai pâle, qu'était farraie què fayait fri, sains se faire pâre dains les maitchés, et yun po remplir les boyevattes ènne de graîvie et ènne de sâbye, po en faire dous moncés bîn séparè.

Mains qué pidie po botaie en mairtche ci gros moteur è luciline, virie cte grosse coérbatte quasi ïn quaît d'heure, d'avaint què n'paitieuche, peus tot d'ïn cop dous-trâs teuf-teuf et le voili en branle. Nos poyîns ècmencie cte besoingne che du, d'aivo ci brut d'enfé, et encoué s'envoidgeaie de n'pe r'cidre des ptétes pieres, chutot dains les eûyes.

È nos é fayut ènne s'nainne po aivoi â di toué de trente mètres cube de graîvie, et è pô prés ché de sâbye. Po servi lai machine, Geiser d'maindait trente sous di mètre cube

È n'nos d'moérais pus què allaie tchri le ciment que cotait painé quairainte sous le sait.

En l'étâle tot révaie cés piaitons, peus empieraie po faire bîn piaîn. È nos fayait allaie r'tcheri les pieres et le sabye en lai carriere. D'avaint que dous maiçons de l'entreprije "Molinari" n'venieuchînt nos édie, po coffraie le creux, y faire lai morlatte po poyait y botaie pus taîd des véyes traivoiches de tch'mînn d'fie.

Les dous mon père nos f'sîns le motchie (le r'muaie et le mâciè bîn chur en lai pâle, po le moéyie nos pregnînt ïn

airrôsou) d'avaint d'le condure d'aivo lai boyevatte és maiçons qu'le botînt voué è fayait et qu'le damînt po què n'y euche pus de p'tchus d'air, què feuche bîn sôlide.

Tiaind nos aint t'aivu tot fini de cimentaie, è nos d'moéraie encoué quéques mètres cube de concaissie, qu'nos aint poyut vendre, dînche coli nos é paiyie ènne paitchie de ço qu'coli nos aivais côtaie.

Coli était dje bîn pus aîgie po nentaiyie l'étâle, et nos étîns tçhiyte de pûjie et poétchait les soiyes de mieûle.



Mitnaint po cimentaie, c'ât ïn hanne que vînt d'aivo ïn "camion è béton" et c'ât d'aivo ïn gros tuyau qu'ïn ôvrie l'condut voué èl l'fât.

Raiméssaie di cija.

Po foénaie, nos ècmencîns pai soiyie l'voirdgie, en lai fâ, è case des aibres, nos raiméssîns les bovâts po les fotre laivi. Poche que c'était di tot croûye forraidge po lai saintè des bêtes.

C'ment è y aivait brament de cija, ìn cop l'heirbe soiyie nos l'raiméssint po en faire des p'téts faigats qu'nos botins dains des p'téts biains saits, po què feunécheuse de maivurie et de soitchi, pendus en lai sôte, mains bîn â soroiye, nos en aivînt aidé prou, po tiaind qu'nos f'sînt les andoéyes, les tchos salès, lai compôte és raîves.

Aitot po tiaind qu'è fayait faire ìn brûe po l'aivalaie en ènne roudge bête qu'était cote â raindge.

L'heirbe copée en lai soiyouse ét traivaiyie en lai foûertche et â rété ne v'nait'p tchaipièe c'ment mit'naint, adjedheus c'at le moyou que d'moère tchus le càre " le cheûjîn" qu'an servéchai po le loitchat des bêtes.

Ènne boinne loitch'rie po les roudges bêtes

Ìn cop les bêtes en roitches, tos les saimdé, è fayait faire le cheûjîn, bîn nenttaiyie le fond d'lai graindge chutot d'vaint les boérainçes, tot le raissembiaie en ìn moncé, d'vaint d'le péssaie â gros créle posè tchus ìn trâté, què fayait bîn s'coûre po y révaie les beûtches.

Aiprés botaie en piaice le vannou po démâciè le bon cheûjîn, (cious de foin ou grainnes de foin) d'lai tiere, des p'téts cayos et di poussat. Peus an le botait dains de grosses saïtches po le r'pàre po le loitchat des bêtes.

Le Loitchat

An le poétchait dains ènne mé, an y voichait ènne grose tiaisse de graînes de yîn tieute et encoué bîn tchâde pai-tchus. Peus di creuchon, d'lai noire fairainne, d'lai sa, qu'an ècmencait de mâciaie d'aivo ènne trein sains maintche, po n' pe se breûlaie.

An finéchai aivo les mains, po le botaie dains les copats d'vaint les poétchaie dains lai roitché di temps qu'les bêtes s'aibreuvînt tchus le nô d'vaintl'heus.



Djainvrie 2005

Le Vâlat